

La'ó Hamutuk

Institutu ba Monitor no Analiza Dezenvolvimentu Timor-Leste

Rua Dom Alberto Ricardo, Bebora, Dili, Timor-Leste

Tel : +670 332 1040

Email: laohamutuk@gmail.com Website: www.laohamutuk.org



Komunikadu Imprensa

LA'Ó HAMUTUK PREOKUPA TANBA ORSAMENTU JERÁL ESTADU 2020 KONTINUA DEPENDÉNSIA BA OSAN HUSI FUNDU PETROLÍFERU

Dili, 6 Novembru 2019

Relasiona ho proposta Orsamentu Jerál Estadu ba 2020 ne'ebé Governu entrega ona ba Parlamentu Nasional, iha loron 30 Outubru 2019, La'ó Hamutuk nudár membru husi FONGTIL ne'ebé servisu mós ba asuntu Orsamentu Estadu no Fundu Petrolíferu, partisipa iha audiénsia ida ho Komisaun C Parlamentu Nasional hodi hato'ó análize kona-ba proposta orsamentu ba 2020 ne'e.

Iha La'ó Hamutuk nia intervensaun, peskizadora ba asuntu finansiamentu estadu, Febe Elizaria Gomes, hato'ó La'ó Hamutuk ninia apresiasaun ba Governu ne'ebé aloka orsamentu barak liu ba dezenvolvimentu iha area rural. Nia mós husu governu atu aloka orsamentu ne'e tuir mekanizmu ne'ebé garante transparénsia no akuntabilidade, no mos kria mekanizmu monitorizasaun ida ne'ebé di'ak atu asegura atu nune'e bele fó duni benefísiu ba povu sira iha area rural.

“La'ó Hamutuk preokupa tanba OJE 2020 nafatin hatudu katak Timor-Leste seidak iha dalan loos atu hasees-an husi dependénsia ba osan husi Fundu Petrolíferu.”

Relasiona ho Mega projetu Tasi Mane, La'ó Hamutuk nafatin ezije atu iha estudu independente kona-bá kustu, benefísiu ho risku husi projetu ne'e molok Parlamentu aloka orsamentu barak liu tan ba setór ne'e. Tuir nia, estudu sira ne'ebé oras ne'e iha, mai hotu ka finansia husi parte ne'ebé iha konflitu interese ho projetu ne'e.

“Projetu Tasi Mane se uza maioria Timor-Leste nia rekursu sira ne'ebé tuir loloos bele uza ba dezenvolve di'ak liu tan setór sira ne'ebé sei fó benefísiu sustentável liu ba Timor-Leste, hanesan setór edukasaun, saúde, bee no saneamentu, no mós setór ekonomia sira hanesan agrikultura, turizmu no indústriá ki'ik sira.”

Kestaun seluk ne'ebé La'ó Hamutuk hato'ó iha audiénsia ne'e mak proposta governu nian atu hasa'e bareira másimu empréstimu nian ba tokon \$750 ne'ebé sei loke dalan ba Governu atu asina kontratu imprestimu nian too montante tokon \$750 iha 2020. La'ó Hamutuk husu ba Parlamentu Nasional atu labele aprova proposta ne'e tanba loke dalan ba Timor-Leste atu foti empréstimu barak liu tan no sei sai todan ba povu Timor-Leste, agora no aban bainrua.

Audiénsia nee realiza iha salaun konferénsia Parlamentu Nasionál nian. Partisipa mós iha audiénsia nee membru Fongtil sira seluk hanesan Core Group Transparénsia, Rede ba Rai no Asosiasaun HAK ne'ebé hato'ó mós sira nia análize ba proposta orsamentu ne'e.

Deputadu/a sira iha Komisaun C apresia hanoin sira husi sociedade sivíl no enkoraja nafatin partisipasaun sociedade sivíl nian iha prosesu diskusaun ba OJE 2020 ne'e.

Ba informasaun liu tan bele kontaktu La'ó Hamutuk liu número telefone no email iha leten, hare website <http://www.laohamutuk.org/econ/OGE20/19OGE20.htm>, ka download submisaun La'ó Hamutuk nian husi <http://www.laohamutuk.org/econ/OGE20/parl/LHSubOJE2020-30Oct2019te.pdf>